

Tessalônica anuabu Paulõ ha dukũ hatu kene bumanikiaki

1 TESSALONICENSES

Paulõ hatukiri xinãnikiaki, na hãtxarã

1 ¹ Ë Paulõ, ã merabewanika Silvano inũ Timóteobetã ã matu kene bumai uĩrakãwẽ. Tessalônica mae anushũ mã ikũwaĩ nukũ Epa Deus inũ nukũ Shanẽ Ibu Jesus Cristobe mã ma dasia hatubekẽ Deusũ hau matu duawakĩ unãnuma matu hiwemakubainũwẽ.

**Tessalônica anuabũ ikũwaĩ pe hiweabuwẽ taeshũ
Paulõ hatukiri Deus kẽwãnikiaki, na hãtxarã**

² Matu dasibiwẽ taeshũ Deus kẽwãkĩ matu hakimama xinãkĩ Deus nũ matu yukashũkubainaii. ³ Mã eskai hiwea ikũwaĩ Jesuski txiti itã, ikũwaĩ betsabube merabenaĩ bika tenebiai hawa txĩtuãma nukũ Shanẽ Ibu Jesus Cristo mã manaya nukũ Epa Deusbe hãtxakĩ matu dayuishũkĩ matukiri xinãkĩ nũ heneama ikũkainaii. ⁴⁻⁵ Ë betsabũ inũ ã puibuũ, matu anu kashũ Jesusũ kakape matu yusĩkĩ nukũ hãtxa bestiwẽma Jesus Cristo datã akĩ nũ matu amaimaki. Hakia Deusũ kuxipa matu uĩmakĩ hawẽ Yushĩ Pepawẽ dami atimaska matu uĩmakĩ ikũhairawamakĩ hawẽ hãtxa pepa txanima kayabi keyutima unãkĩ nũ matu yusĩmaki. Nuku nĩkatã mã ikũwaĩwẽ taeshũ hanu Deus matuwẽ nuikĩ hawenabu matu wakatsis ikĩ matu katuni nũ unaiĩ. Haska matu anu nũ pe hiweima inũ haska matu merabewa bestikĩ nũ matu bikawama ikima matũri mã unãhairaii. ⁶ Txanima nuku nũ ikai keskai inũ nukũ Shanẽ Ibu Jesus hiweni keskai matũri mã nuku txibãyã matu itxakawakĩ matu nuitapawabiaibũ Deusũ Yushĩ Papatũ matu benimawakubainaya Deusũ kakape mã ikũwãkubainimabuki. ⁷ Mã haskaya ha mai pakea dabe Macedõnia inũ Acaia anushũ Jesus ikũwãbaunaibũ mã ikai kaka nĩkakĩ haska Deusũ nuku hiwemakatsis ikai tapĩkubaunimabuki. ⁸ Matũ dukũ ikũwãkĩ nukũ

Shanē Ibū kaka pepa mā txibākī hatu uĩmaya Macedônia inū Acaia besti anuama hakia matũmebiri Deusũ hãtxa ma tapĩtã matũri mã hatu yusĩayã paai mae betsa betsapa anuabũ mã haska ikũwaĩbu habũ matu nĩkakĩ keyubaunaibũ nũ ana hawa hatuki txanitirumaki, mã ma hatu amayarã. ⁹Ha inũ, mã haskaimabukiri ha mae anushũ nukukiri txanikĩ txanima haska mã nuku duawaima txanimisbuki. Ha inũ, damiwakĩ yushĩ itsa wabu mã kẽwãbiapauni ha henetã Deus hiwea kayabi ikũwãkĩ mã duawakĩ taewaimaki. ¹⁰Haska bestikiri mã xinãma hakia Deusũ bake Jesus mawa ana bestẽwani nai anua txĩtũkirã ana hushũ nuku mekeaya hakia yurabu txakabumisbu Deusũ hatu kupikĩ hau nuku meama ishanũ, iwanã, unãkĩ uĩshanũ ika mã manakanaii.

Tessalônica anua eskai Paulo hatube dayanikiaki, na hãtxarã

2 ¹Ē betsabu inũ ě puibuũ, matu anu yusĩ kai hamẽ nũ kama ikima mã unaiĩ. ²Ha inũ, matu anu nũ hikiriamakẽ Filipos anushũ nuku itxakawakĩ nuku nuitapawaimabu mã unãriaii. Nuku bika tenemabiaibũ Deusũ nuku kuxipa wakubaina hawẽ kakape nũ matu yusĩkubainimaki. ³Hanushũ matu yunukĩ yusĩkĩ nũ kaneama ikimaki. Ha inũ, txakabuwakĩ nũ matu hawa parãma iriainimaki. ⁴Hakia Deusũ nuku unãti watã yuikĩ: “Huni pepabuki”, itã xinãkĩ hau hawẽ kakape nũ yuikubaishanũ nuku yununi nũ matu yui hãtxakũkainaii. Deusũ besti nukũ huĩti unãmiswẽ taeshũ Deus besti nũ benimawakatsis ikaii, yurabu benimawatiwẽ nuimarã. ⁵Haska wakĩ hãtxa hawẽrua bestiwe hau hawẽ mã nuku kẽwãnũbũ nũ matu parãma ikima mã unaiĩ. Ha inũ, matu parãtã pei binũ, iwanã, nũ matu yusĩama ikima Deusũ unãriaikiki. ⁶Ha inũ, Jesusũ kuxipayakĩ nũ matu yunutirubia matu inũ yura betsabu hau nuku shanẽ ibu wakĩ kẽwãnũbũ nũ hari yunukĩ matu hãtxa wama ikimaki. ⁷Hakia ewabũ hawẽ bakebu pe mekekĩ pimamis keska wakĩ matube hiweshũ matuwẽ nuikĩ unãshubira yusĩkĩ nũ matu meshtãmakubainimaki. ⁸Haska wakĩ matu abukĩ Deusũ kakape yusĩ benimai matuwẽ nuhairai kashakatsis iki haska xinaĩ ě matu mawashũkeanimaki. Haskawẽ taea ana habias matukiri xinãkĩ matu merabewanũ, iwanã, hamapai betsa nũ matu ashũkatsis ikaii.

⁹Ē betsabu inũ ě puibuũ, Deusũ kakape matu yusĩ kashũ matũ piti pikĩ matu bika wakĩ nũ matu txikix wakatsi ikama bariri inũ mexu merã dayahairai yumãkĩ nukũ dayawẽ taeshũ nukũ piti nũ bikubainima mã unaiĩ.

¹⁰Haska mã ikũwaĩbube hiwea pepakũkaĩkĩ hawa kaneama nũ matu hawa txakabuwama ikũkainima Epa Deusbetã mã unaiĩ. ¹¹⁻¹²Nũ matu eska wani mã unãriaii. Bestibu tibi matu benimawakĩ nũ matu pewakubainirã, haska epabũ hatũ bakebũ txakabuwai nemamis keska wakĩ mã Deus hiweshũkĩ haska abuai keska maturi mã inũbũ nũ matu

yunua matũ txakabu unãtã mã henekubainimaki. Haska Deusũ hawẽ mae kayabi pepa anu matu hiwemakatsi ikai ma bebũkiri matu kenani haskakiri nũ matu merabewakubainimaki.

¹³Haska wakĩ Deusũ kakape nũ matu yusĩma nĩkakĩ hunibũ yusĩa keska mã xinãma hakia Deusũ hãtxa besti txibãkĩ xinãkĩ mã ikũwãyã hawẽ hãtxawẽ taeshũ Deusũ matu xinã betsa wamakubainimaki. Deusũ matu haska waimawẽ taeshũ nũ matu Deus kẽwãshũkubainaii. ¹⁴Hamẽ betsarã, Jesuswẽ taea ẽ betsabu inũ ẽ puibuũ, Judéia anushũ judeubũ hawenabũ Jesus ikũwaĩbu hatu itxakawabu Deusũ bake Jesus Cristo ikũwaĩ yumanibu keskai habiaskari wakĩ matunabũri matu itxakawabu maturi mã nuitapaimabuki. ¹⁵⁻¹⁶Ha judeuburã, ha dukũ hatũ shenipabu betsabũ Deusũ hãtxa yuishunikabu betsabu ũ unuatiã hatu tenãkubiranishũ hanushũ habiabũ bababũri nukũ Shanẽ Ibu Jesus tenãrianishũ nukuri itxakawakatsis ikĩ nuku kaĩmakĩ haska Deusũ abuai ashũama nuku putakubainimabuki. Hanushũ Deusũ judeubumari hatu xinãkĩ haburi mekekatsi hanu hatu anu nuku yunuima nũ matube hãtxaya judeubũ nuku nemapaikĩ judeubu inũ judeubuma hatube dasitã hatu nukuki sinatamakubaĩkanikiki. Haska wakĩ hatũ txakabu betsa betsapa ana matsãkĩ itxawakubainaibuwẽ taeshũ samama hatu kupitxakayamakatsi Deusũ hatu manakaki.

Tessalõnica anu Paulo ana bai kakatsi inikiaki, na hãtxarã

¹⁷È betsabu inũ ẽ puibuũ, matu anushũ nuku bika tenemabu nũ huima ushe itxapama matu xinãkĩ manui matu ana uĩ kanũ, iwanã, Deus matu yukashũkĩ nũ matu xinãkubainaii. ¹⁸Haskakũkaini nũ matuki ana bai kakatsi ikaya ẽ Paulo ẽ yubakabiakũkainaya Satanãsã ea beshtenũ ishũ nuku nemaimaki. ¹⁹Nũ haskakũkaikĩ nũ matu yusĩtania xinã betsama ikũwã bestikĩ betsabu ikai keskama hatu binui mã hawa txĩtuãmawẽ taea hanu kupiaitiã nukũ Shanẽ Ibu Jesus ha nũ manaka huaya nukũ benima pae matuwẽ taeshũ tsuã nuku mebĩtiruma nũ unaiĩ. Haskai nũ benimaya matuwẽ taeshũ Deusũ nuku kẽwãshanikiki. ²⁰Matuwẽ taeshũ Deusũ hawẽ kuxipawẽ nuku duawakĩ nuku benimawaikiki.

Timóteo hau hatu uĩtanũ Paulõ yununikiaki, na hãtxarã

3 ¹Matuwẽ nuhairakĩ matukiri unãkatsis ikĩ ana nũ tenetirumawẽ taea Atenas mae ewapa anushũ ea inũ Silvano manakai hiweyushũ ²nukũ betsa Timóteo nukubetã Cristokiri kakape yusĩmis matu anu nũ nitxĩmaki, hau matu xinã txãkãwãkĩ hau matu ana kuxipa wai kanunã. ³Ha inũ, habũ nuku itxakawabiaibũ Deusũ nuku hatube hiwemai mã unaiwẽ taea hamapai bika xarabu mei yumãbiai hawa dateyamakãwẽ. ⁴Haskakẽ Jesus ikũwãriabumã nuku itxakawaibu nũ yumãshanaikiri matu yusĩ kaimashũ bebũkiri nũ matu yuikubainimaki. Na eskatiã

haska nū matu yuima keska uĩkĩ mã ma tenekĩ meaii. ⁵Matukiria kaka nĩkakatsis ibiai tsua yukatima matu xinaĩ: “Satanásã hatu parã ma txĩtũxinabumẽkai ika datei hamẽ nũ hatu yusĩmamẽkai”, ikĩ eã ẽ ana manatiruma matu anu Timóteo ẽ nitxĩmaki, haskamẽ mã ikũwãkubainai hau nukuki txanikĩ nuku banabimayushanunã.

⁶Hakia mã ikũwai txĩtuãbuma inũ mã abunamei heneama Tessalônica anua haska kaka Timóteo nĩkatãxĩshũ nuku yuia nĩkai haska nũ matuwẽ nuiiai keskariai matũri nuku ana beisnũ ika mã nukukiri xinaĩ matu uĩtani huxĩshũ nuku yuikĩ benimawaxinaki. ⁷Haskakẽ ẽ betsabu inũ ẽ puibuũ, nuku bika tenemakĩ yumãwãbiaibũ ha xinãma mã Jesus ikũwai txĩtuãbumakẽ haska matu nĩkatã hawa ana matuwẽ dateama nũ xinã txãkaii. ⁸Hakia nukũ Shanẽ Ibu ikũwai mã txĩtuãmawẽ taea nũ ana hawa punu nukama matuwẽ benimai nũ hiweaii. ⁹⁻¹⁰Hanua nukubu matuki ana bai kashũ ana matu yusĩkĩ kuxipa wakĩ haska nũ matu yusĩ keyuriama matu yusĩ kakatsis ikĩ mexu merã inũ bariri nũ matu Deus yukashũkubainaii. Mã haskakĩ ikũwai txĩtuãbumawẽ taeshũ mã nuku benimawaya haska washũ matuwẽ taeshũ Deus nũ kẽwãkĩ keyutirumaki.

Paulo Deusbe hãtxakĩ dayuikubainikiaki, na hãtxarã

¹¹Haskakẽ nukũ Epa Deus inũ nukũ Shanẽ Ibu Jesusũ nuku merabewakĩ hau matu anu nuku nitxĩkĩ nuku yunushanũbũwẽ, nũ matu uĩ kanunã. ¹²Ha inũ, nukũ Shanẽ Ibũ hau matu ana ewawakĩ abunamemakĩ nui itxapa matu inãkubainũwẽ. Matu haska wa hayatã ikũwai betsabuwẽ nuikĩ yurabu dasibiwẽ nuitixara ikubaĩkãwẽ, haska nũ matuwẽ nuikũkainai keskairã. ¹³Haskawẽ taea nukũ Shanẽ Ibu Jesusũ matu xinã mestẽwãkĩ matũ hamapai txakabu beshtenishũ mã hawenabu hawa txakabu matukiri metutirubuma mã hiwekẽ hatiãra nukũ Shanẽ Ibu hawẽ tsumabube ana huaitiã nukũ Epa Deus bebũ mã nia hau matu uĩshanũ haska matukiri ẽ xinaĩ. Haskakirã.

Eskai hiwekĩ Deus benimawatirubu Paulõ yununikiaki, na hãtxarã

4 ¹⁻² Ẽ betsabu inũ ẽ puibuũ, Jesusũ nuku yununi hawẽ yusĩa nũ matu yusĩtanimã mã unaĩwẽ taeshũ kenewẽri nũ ana matu keneshunai uĩrakãwẽ. Haska bari tibi Deus mã benimawatiru nũ matu yusĩkubainimã mã akai keska wakĩ ana habiasri heneama akubaĩshãkãwẽ, iwanã, nũ matu ana yunuaii. ³Haskakẽ Deusũ matu pepa besti wanũ, iwanã, matu yunukĩ: “Aĩbu mĩ aĩmawẽ kemuama inũ, huni mĩ benemawẽ kemuama haska ha dabe mã haya hatũ aĩbe besti hau txutanamekubainũbũwẽ”, iwanã, xinãmiski, Deusunã. ⁴⁻⁵Haska inũ, Deuskiri unãma inũ ikũwãbumã aĩbuaibu tibiwẽ kemukĩ txutabaũmisbu keska iyamakubaĩkãwẽ. Hakia Jesus ikũwai aĩyãkatsis ikĩ shabakabi Deus uĩmai pe hiwenũ ika habe biakanãtã nuitapawama hatũ mabu mekei hau

pe besti ikubainübūwē, hatū aĩbe menamei txutanameirã. ⁶Hanushū bebūkiri nemakī haska nū matu yuima ana nīkairakāwē. Tsuabūra huni betsa parākī hawē aĩ mekī hatu itxakawaibu Deusū hatu kupishanikiki. ⁷Hakia nū haska txakabui atimapakūkaĩmis Deusū abuisimaki. Haskawē taea nū pepa bestikubainübū hawenabu wakī Deusū nuku katuniki. ⁸Hanushū tsuabūra na yusĩa danākī hunĩ yusĩa danāma hakia Deusū hawē Yushĩ Pepa matu ināmis danākanikiki.

⁹⁻¹⁰Ha inū: “Jesus matubetã ikūwaĩbu hatube abunamei hatuwē nuikubaĩkāwē”, akī Deusū ibubis matu yusĩkī yunuima tapĩmashū mã akai Macedônia mai pakeanushū ikūwaĩ dasibibū mã hatube haskaiwē taeshū hawa ana betsa maewama nui abunametxakayamakūkaini beshtekeama ipakekāwē. Mã haskakūkainaiwē taeshū ana haskakiri nū matu keneshūtirimaki. ¹¹⁻¹²Hakia haska nū matu yusĩkī nū matu uĩmatanima mã nuitapaibukiri xināma txikixama ea iki daketapama matū mekenē dayakūkaĩkī matū hamapai bikubaĩkī unānuma hiwekī hatu yuāmayamakāwē, mã haskaibu ikūwābumã matukiri pe uĩkī hawa txakabuuma hau xinānūbunã.

Jesus ana huirã, eskakirãshanikiaki, na hãtxarã

¹³Ē betsabū inū ē puibuũ, Jesus ikūwaĩ betsa mawaya mã punu nukayamashanübū matu yusĩnū ea nīkakāwē. Jesus ikūwaĩ mawai habū Jesus ikūwāma keskabumaki. Haskawē taea kashai bis itxakayamai: “Ana hiweamaki”, iwanã, xinākī yuiyamakubaĩkāwē. ¹⁴Hakia nukurã, nū ana haskakiri xināmaki. Jesus mawa Deusū ana bestēwani nū ikūwaiĩ. Haska wani ikūwaĩ nukuri nū mawa Jesus bestēwani keska watã ha huaitiãri Deusū nukuri bestēwãtã Jesusbe nuku iyushanai nū unaiĩ.

¹⁵Na eska matu yuikī haska nukū Shanē Ibū nuku yusĩni matu yusĩnū nīkakāwē. Jesus ana huaya haki nukui nū ikūwaĩ hiweabu nuku dukū nū bebuama ishanaii. ¹⁶Hakia Deus nai anua sai ikĩ hawē nai tsuma shanē ibu yunua hatū dasibibu itxawaya Deusū trombeta hawē nai tsumã txã txã akaya nai anua nukū mekenã Cristo butui shaba putxinĩ nikē Cristo ikūwaĩ mawanibu habu dukū Deusū ana bestēwãtã ¹⁷nuku nū hiweaburi hatube Deusū nuku ainiaya nai kuĩ merã Jesuski nukutã nū habe hiwepakeshanaii, ikibi ikirã. ¹⁸Haskawē taea na yusĩa hãtxa nĩkai ana hawa dateama xinã txãkaĩ hatube benimanamerikubaĩkāwē.

5 ¹⁻²Ē betsabū inū ē puibuũ, bari hawē heneai anu nukū Shanē Ibu hushanai tsuabūra manama xināma huni yumetsu mexu merã hawaira humis keskai Jesus hawairakirãshanai mã ma unãyã hatiãra hushanai nū ana hariri yuikī matu keneshunamaki, mã ma tapĩkenã. ³Haskakē ana hawaki yurabu dateama yuikī: “Unanuma hiwei hawaki mesei dateama hiwekubainãkāwē”, ikubaini ana hawaki mesei dateabumakē Jesus ana niti ikama hawairakirã hatu kupishanikiki,

aĩbu bake kaĩnũ ika isĩ berukutã ana maiãma kaĩmis keskairã. ⁴Hamẽ ã betsabu inũ ã puibuũ, maturã, mã ma unãnepabuki, tsuãra kakape tapĩkĩ ikũwãkatsi ikabuma keskamarã. Hatiãra nukũ Shanẽ Ibu hui haskakirãshanikiri ana matu yuinũ nĩkakãwẽ. Huni yumetsunũ ika hawaira hatiãra tsuã unãmakẽ humis keskai nukũ Shanẽ Ibu bebũkiri tsua yuiama hawairakirã tashnishanikiki. Haskaya habũ ikũwãkatsi isbuma mexu merã hiweabu keska teku iki: “Habaa!” ishãkanikiki. Hakia habũ ikũwaĩbu hawa dateama ishãkanikiki, nũ ha manakamis huayarã. ⁵Haskawẽ taearã, maturã, dasibibũ Jesus mã ikũwaĩ mã ma shabaki pesea keskabuki. Hakia nukuburã, nũ mexu anua keskabumaki. ⁶Nũ haskawẽ taearã, yura betsabu hawa unãma ushamisbu keskama txikixyamakubainãkãwẽ. Hakia ibubis mekekĩ pe besti xinãkĩ haska Jesusũ mia abuai keskai txibãkĩ manakubaĩkãwẽ. ⁷Hamẽ, ha mexu merã keska hiweaburã, ushabu inũ paẽmisbu keskabuki, hawara ishanai unãbuma inũ hatiãri Cristo ana hushanai xinãbumarã. ⁸Hakia nukuburã, nũ ma mexua anua shabaki tashnia keskabu nũ ikũwãkĩ pewakubaĩmiswẽ taea nukũ Shanẽ Ibu ana hushanai hawa hakimama manakubainãkãwẽ. Nũ habubetã ikũwaĩ betsabube duapai abunamei merabenãkĩ nukũ Epa Deus ha bestiki txiti ikubainãkãwẽ. Nũ haskaiburã, Romano soldadobũ hawẽ yura hunenũ, iwanã, mane tari manãkiriã sawemis keskai hawaki dateama nũ pe mekea hiwetirubuki. Haskai hawa dateama nukũ Shanẽ Ibu manakĩ hatũ besti nuku mekeshanai nũ manaii. Haskakĩ hau soldadobu tsuã hatu deteyamanũbũ hatũ bushka mekekĩ hunekĩ mane maiti sawemisbu keskai nukuri dateama pe mekea nũ hiwetirubuki. ⁹⁻¹⁰Txanima nukuwẽ taea Jesus Cristo nuku mawashuniwẽ taeshũ Deusũ nuku hawẽ kupikatsi ikama nũ hiweabu inũ nũ mawabu nukũ Shanẽ Ibu Jesus Cristowẽ nuku meketã nuku habe hiwemashanai nũ unãĩ. ¹¹Haskawẽ taea ana Jesus ikũwãkubaini heneama betsabube benimai kuxipanamekubaĩkãwẽ, mã ma ikũkaĩmis keskai heneamarã.

Haskai ikũwaĩbũ xinaĩ hiwenũbũ Paulõ hatu yununikiaki, na hãtxarã

¹²⁻¹³ ã betsabu inũ ã puibuũ, matu merabewanikabũ matu merabewakĩ nukũ Shanẽ Ibũ daya akĩ haska mã kaneaiibu matu pewakĩ yusãĩbu hatukiri petxiama hatu xinãkĩ abukĩ duawariakubaĩkãwẽ, hatũ daya pepawẽ taeshunã. Ha inũ, matubetã ikũwaĩbube unãnuma hiwekubaĩkãwẽ. ¹⁴ ã betsabu inũ ã puibuũ, nũ ana matu yunuai nĩkairakãwẽ. Dayama txikixaiibu hatu yusĩ pewakĩ hatu ha akubaĩkãwẽ. Ha inũ, hatũmebi hawara txakabuwatã kasmai nĩkatã beshtekei babuaibu hatu merabewakubaĩriakãwẽ. Ha inũ, betsabũ dama ikũwaĩ huĩti shubu heneama hatu merabewakubaĩriakãwẽ. Ha inũ, yurabu hiwe txakabu haskaira hatuki sinatama unãshubira hatu tapĩmakubaĩkãwẽ. ¹⁵ Ha inũ, yura betsã matu txakabuwaibu ana hatube manakunama mã pepakatsis

ikairã, haska txakabu huai tenetã pepakĩ ikũwaĩ betsabube merabenãkĩ mã akai keska wakĩ mai hirabi anuabu yurabu ashũriakĩ hatu merabewakubaĩkãwẽ. ¹⁶Haskakubaini benimai heneyamakubaĩkãwẽ. ¹⁷Hamapai tibikiri hawaira xinãtã Deusbe hãtxakubaĩkãwẽ. ¹⁸Hawara tibi mã haya inũ mã hayama haska Deusũ matu unaĩwẽ taeshũ ha besti kẽwãkubaĩkãwẽ, mã haskaibu Deusũ matu abuikiki, mã Jesus Cristo ikũwaĩbuwẽ taeshunã. ¹⁹Tsuabura Deusũ Yushĩ Papatũ merabewa hawẽ kuxipawẽ dayaibu nematimaki. ²⁰Haska inũ, Yushĩ Papatũ Deus hãtxashunika wakĩ yusĩmai danãyamakubaĩkãwẽ. ²¹Tsuabũra yuikĩ: “Deusũ hãtxa ẽ matu yusĩaiĩ”, ikĩ hatu yusĩaiĩbu haska Deusũ hãtxa kayabi yusĩmẽkaĩ unãti wakĩ nĩkakubaĩkãwẽ. Deusũ hãtxa yusi pe waya unãtã ikũwãkĩ ha yusĩa mã txibãtirubuki. ²²Hamapai txakabu xarabu danãkubaĩkãwẽ, nĩkamarã.

²³Nukũ Shanẽ Ibu Jesus Cristo huaitiã dasibibu mã tsua txakabuuma Deus hamebi unãnuma hiweatũ matu meribi pepahairawakĩ matũ hamapai txakabu putamakĩ matu mekekubaĩkatsi matũ xinã inũ matu yushĩ inũ matũ yura hawa txakabuma hau matu pe bestiwakubainũwẽ. ²⁴Haska wakĩ Deusũ matu katunishũ henebainama matu pepawakĩ meneshũshanikiki.

²⁵È betsabubu inũ ẽ puibuũ, hau nukuri merabewanũ nuku hakimama Deus nuku yukashũkubaĩkãwẽ. ²⁶Ha inũ, ikũwaĩ beaibu matũ betsa kayabi keska wakĩ hatu ikĩ beyawakubaĩshãkãwẽ, benimawakinã. ²⁷Haskakẽ nukũ Shanẽ Ibu ea kuxipa waniwẽ taeshũ matu yununũ ikũwaĩbu dasibibu itxati tibi anushũ na kene ẽ matu bumakĩ yunuai shabakabi hatu yuishũkubaĩkãwẽ. ²⁸Mã hatu haska waya nukũ Shanẽ Ibu Jesus Cristõ hau matu dasibi duawakubainũwẽ.

Hatiski, ẽ hãtxarã.

Paulo